



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tir_yimym



tir yimym

TAPAK 8

Zelenskyy-i anuolen aliba linuktem dang mera agitsü mepeshi

Diana Shnaider-i Hong Kong Open kokogo

VOL. XXII ISSUE NO. 26 (ADOK 26)

DIMAPUR

TENTONÜ (MONDAY)

YIMPOKSÜI (NOVEMBER) 04, 2024

₹ 5.00

CM Neiphu Rio-i DGC nung PM-USHA tenzüksü; facility aika lapoktsü

Dimapur, November 3, 2024 (TYO): Chief Minister Neiphu Rio-i November 2, 2024 nü Dimapur Government College (DGC) nung Pradhan Mantri Uchchar Shiksha Abhiyan (PM-USHA) atema lung azüngtsü aser facility aika sayatsü.

CM Rio-i Academic Building, Incubation Centre, Skill Hub, Girls' Hostel, Commerce Block aser Rest Room lapoktsü.

National Assessment and Accreditation Council (NAAC)-i tawa tu DGC nem B+ grade agütsüogo.

"DGC-i taküm 83% pass rate nguteta liasü aser Nagaland University (NU) Top 10 rankings nung kaketshir 9 densema liasü. DGC nung kaketshirtem rongnung tetsür 64% lir aser iba ajanga Nagaland nung tetsürtemi kaketshir shisatsü bushibaren nung jenjang temabai atuba sayur" ta CM Rio-i ashi.

Tetsürtem kanga tejakleni aoer:

Tetsürtemi kaketshir shisatsü bushiba nung dang masü saka yimten yimsüsüba nunga tejakleni odar. Taküm ULB election nung tetsürtemi 33% quota dak alia general category nunga menden 8 nung takok ngutetogo, ta pai ashi.

"Yimyatsüya melii kaketshir shisatsü dang anguba nung lendong keta lir anungji tesayurtemi kaketshirtem dang yimyatsüya sayutsüla. Yamaji asü nung dang parnok züngtemba sülen tagitsü aketba nisung kaka akümtsü. Kümshia DGC nung kaketshirtemi admission asütsü raktepba ajanga principal aser



November 3, 2024 nü Dimapur Government College (DGC) nung PM-USHA tenzükba sentong nung CM Neiphu Rio-i o jembiba angur.

teaching staff-i bendanga agütsüba aser meranga inyakba kuli agütsür" ta CM Rio-isa ashi.

Dimapur nung Science College nungdaker:

Dimapur nung full-fledged Science College ka nungdaker. Dimapur ya rail aser air connectivity aliba tongtipang tesem ka lir anungji state nungi dang masü saka tangalen nungia kaketshirtem arua azüngtsü, ta paisa ashi.

Higher Education Minister, Temjen Imna Along-i Nagaland nung Higher Educational Institutions renlokba aser melenshiba mapa tajung inyakba atema tenüngsang agütsür, ta Rio-isa shisem.

"Dimapur ya maongka angudak tesem ka lir. Dimapur ajangba National Highways ya East Asia tashi sendaktepa lir aser iba lenmang ya South East Asian Transnational Highway no-1 akümtsü. Anungji asenoki iba

maongka agitsüla aser asen state ya rongsenketzung tongti ka kümdaktsütsü asoshi tebilemstü khuret abenba lanurtem adokdaktüsüla" ta paisa ayongzük.

Iba ya "Pradhan Mantri Uchchar Shiksha Abhiyan (PM-USHA)/RUSA (Rashtriya Uchchar Shiksha Abhiyan) scheme amala maparen ajanga inyaktetsü, ta Rio-i ashi.

"Mon district kübok New Model College, Wakching nung kaketshir tazünger kanga ajema lir. Senotsü enokba aser sorkari iba reju lapoktsü atema meranga inyakaka tazünger mali. Yaküm kaketshir 6 tazünger arutsüba liasü saka maru" ta pai tebilemstü o ka lemsatep.

"Ibala mapatong nung tajangzük mali kechiyong kaketshirtem dang nungi tesayurtem teimba liasü. Anungji nungdakba mapatongtem dang inyaktüsüla aser college tasen ka

lapokdang iba meketa school tem peria alitsüla" CM Rio-i ashi.

"DGC ya Nagaland nung college tajungtiba dang masü saka Northeast nung college tajungtem rongnung ka lir. Tanga private colleges dang nungi DGC-i cut of marks tajungba nguteta lir. DGC nung takotet tesayurtem aliba atema kaketshirtem kanga moaogo" ta Minister Temjen Imna Along-i DGC principal aser teaching staffs nem tenüngsang agütsü.

"Nagaland state cabinet-i "contractual teachers" shimba inyakyim anentsü telemtetba agiogo. Kaketshirtemi graduate asüba sülen sorkar mapa kija dang masü saka tanga mapatem bushitsüla ta pai kaketshirtem dang ashi.

"Nenoki moral aser disciplinary curriculum nung jungjunga training agiba dang masü saka skills nunga training agitsüla. Yamaji asü nung dang nenok Nagaland nung takok

anguba senso kaka akümtsü" ta Imna Along-isa ashi.

PM-USHA kübok inyakba mapatongtem:

PM-USHA kübok Nagaland Higher Education-i Units/projects 27 tashi agizüka inyakogo aser iba ajanga sorkar college ajak nung tajangzük nguogo, PM-USHA State Project Director M Kire-i ashi.

RUSA 1.0 aser 2.0 ajanga Department of Higher Education-i sorkar college tem nung facility aika yanglutsüogo, ta pai ashi.

Iba nung Library buildings 4, boys hostels 3, girls hostels 2, Administrative Buildings 3, New Computer Centre 1, Campus Developmental works 4, Science Laboratory 1, Academic Buildings 3, government colleges 15 nung vocational programme Unit 1, State of the Art Research Centre on "Atmospheric Physics & Studies on Severe Weather" 1, New Model Degree Colleges 2 aser Professional Colleges (which are ongoing) 2 dena lir ta M Kire-isa metetdaktüsü.

PM-USHA nung Colleges Component tashi itdaktüsü Grants kübok Centre-i academic buildings tasen asem yanglutsü agizükogo. Iba mapatong ya Dimapur Government College, Fazl Ali College aser Zunheboto Government College nung inyaktüsü atema atema college shia Rs 5 crore lemezüksüogo ta paisa ashi.

Iba scheme nungsa Rs 10 crores endoka incubation, skill hub aser girls hostel yanglur aser contractor, M/S Pelevituo Angami nem contract agütsüogo ta Kire-isa shisem.

Taruba academic year nungi Nagaland nung NEP 2020 tenzüksü

Dimapur, November 3, 2024 (TYO): Taruba academic year nungi Nagaland nung sorkar aser nija school ajak nung National Education Policy (NEP) 2020 mapa tenzüksü ta Nagaland State Level Education Committee (SLEC)-i metetdaktüsügo.

Chief Minister Neiphu Rio menden ser SLEC senden ka nung iba lemtet agi. CM Rio-i School Education aser State Council of Educational Research and Training (SCERT) ketdangüsüa repranger.

Nagaland education system

nung temelenshi aika asütsü aser iba nung sorkar school aika upgrading, downgrading, aser amalgamation asütsü. Sorkar school tem tajungba akümtsü, senotsü shitak lemezüksütsü aser academic jenjang tajungba kümdaktsütsü atema item mapa inyaktüsü ta School Education Department-i metetdaktüsügo.

Nagaland nung nija school tem melapokdang NEP 2020 goals den sendaka aliba quality benchmarks reprangdang ang temelaba agütsütsü ta SLEC-isa lemtetogo.

Kohima nung traffic tetuyuba kar agütsür

Dimapur, November 3, 2024 (TYO): November 5, 2024 nü Hotel Vivor, Kohima nung 16th Finance Commission den senden amentsü aliba atema Kohima Police-i traffic tetuyuba kar agütsüogo.

Iba anogo anepdang 9:00 ako nungi nikongdang 6:00 ako tashi Wokha/Tsemnyu nungi Kohima

tsütsülen aruba gari ajak Meriema Junction nungi New Secretariat leni yoktsü.

Iba tesem anasa alirtemi nungdak balaka madokra gari bener mesenzütsü aser senzütsüsa kümra tanga lenmang ajanga senzütsü mepishir ta Kohima Police-isa metetdaktüsügo.

RIIN ya Nagaland nung minority tribes 4 atema lir

Dimapur, November 3, 2024 (TYO): Nagaland sorkari Register of Indigenous Inhabitants of Nagaland (RIIN) ya minority tribes pezü atema sangdong agütsüba lir ta Chief Minister Neiphu Rio-i ashi.

"Kuki, Kachari, Garo, aser Mikhir (Karbi) nung ya tanga Northeast state tem nunga aika lir aser iba jagi onoki cut-off year atema 1963 latet" ta pai ashi.

1963 matongdang Nagaland nung arua alir Kuki, Kachari, Garo, aser Mikhir (Karbi) nung dang non-Naga indigenous inhabitants ta ajatsü ta CM Rio-i ashi.

"State sorkari 1970 sangdong nung Naga nungeri 80% reservation aser tanünga 20% ji tanünga kintem atema ta shia lir.

Iba atema RIIN ya census mesüra electoral roll ama meinyaktsü. RIIN ya Nagaland nung Naga nung atema masü" ta pai jangjatsüogo.

"Bengal Eastern Frontier

Regulation Act (BEFR) 1873 kübok lisopur kati tesem mashii ka nung ali alitetsü aser litetsü saka parnok indigenous makümtsü. Anungji kin pezü nungi nisungtem cut-off year sülen arua alirtem jangjatsü atema RIIN inyaktüsü. Nisung kari dang tiyazü jembira ibaji ozüng alema inyakba ken o ka akümtsü aser temerenshi alitsü" ta CM Rio-isa metetdaktüsü.

Dimapur nung Inner Line Permit (ILP) mapa inyaktüsü atema inyakdar. Asenok ya Indian Union nung dena lir anungji asenoki India senso shinga bendanga mamshitettsü, tanga kintem-a dendaktüsütsü, ta paisa ashi.

Nagaland state akümdang Nagaland nung Naga kintem dang masü saka Kuki, Kachari, Garo aser Mikhir (Karbi) nungertem liasü. BEFR Act 1873 ya Naga nung atema dang yangluba masü, ta Rio-isa nenshia metetdaktüsü.

"Bendanger shingaia arur ali mesüra kiojen alizüksü makok saka cut off year matongdang arurtembo permanent residents ta sangdongtsü. Asenoki parnokbo madener ta meshitettsü kechiyong yamaji inyakra asenoki temeten anema inyaker asütsü aser sorkar ketdangsubaren nung maaksü bentsür arutsü" ta paisa ashi.

"Nagaland ya 73rd Amendment kübok Panchayati Raj nung maden kechiyong Panchayati Raj system nung elections agir saka Nagaland nungbo village councils atema elections magir. Anungji 'Panchayati Raj halls' ta zülua alirtemi village council halls ta melentsüla" ta CM Rio-isa nenshia metetdaktüsü.

Honibarnü Dimapur District Sports Complex (DDSC) nung Naga Council Dimapur (NCD) küm 75 ajungba benjungmong nung jembidang pai iba osang lemsatepa liasü.

Kohima Law College pur Pre-Christmas sentong agi



Kohima Law College pur November 1, 2024 nü Red Cross Conference Hall, Kohima nung Pre-Christmas sentong agidang Kezhokhoto Savi den kinungtsü, chirnur, professors aser ketdangsür temi cake alemba noksa nung angur.

Dimapur, Yimpoksüi/Nov. 03 (TYO): Kohima Law College pur Pre-Christmas sentong Red Cross Conference Hall, Kohima nung November 1, 2024 nü agia liasü, kong Kezhokhoto Savi o jembir liasü.

Sentong nung jembidang, tanü nenok aika pei kidang süshia, shisaliok nung süshia mesüra takum nung timtem balala ajurua alitsü akok, saka item tebilemstü lia teimla, temoatsü aser tepelatsü Christmas osang arur, ta Savi-i ashi.

Isaia 9:6 nung shia aliba ama asen dangi Yimjung Chuba arur. Yisu asoba aonung tenyar temi tetsübo nung aliba sannüker dang tsübo malitsü aser nisung ajak asoshi tepela tulu bener arutsür ta Laishiba ajanga ashir,

ta pai ashi.

Tasüngtet tsüri asoba kinü tanur ya nisung ama Tsüngrem asoba lir, aser ajemalua tenzüker ka ama na mesükba nung yanglu, aser pai nü tebilemstü aser meimchir ajunga indang tebilemstü angateter, ta ashi.

Yisu alimai aruba nükjidong ya temenenpur nem tekumtet agütsütsü asoshi liasü. Ajisüaka tanü tashi nisung karbo Christmas ya kuli tiazü asoshi amunger alitsü akok, Yisu Khrista-i asen takum nung sempet bener arutsüba mejangjai Christmas kwika muner alitsü, ta Savi-i ashi.

Christmas tetetzü chichiba ya Yisu agizüktsüba lir, na ajemalutsüla, temenen nangzüktsüla aser Paji nü Kibur aser Kumtetdakba ta

agizüktsüla, ta ashi.

Iba sentong nung Rhonbeni Kikon menden liasü aser Moasenla, Asst. Professor ajanga sarasadem. Kohima Law College Evangelical Union ajanga pela agizükba ken ka aten aser Bintopong aser Katimongla Longchar natia temeja ken ka tena liasü.

Iba sentong nung sempet lemsatepba aser choir tem ken tentepba agia liasü, kong choir telok aseme shilem agi aser takok angur osang ya Dr. Sujata Upadhyaya Asst. Professor ajanga sangdonga liasü.

Sentong nung Henry Pauzielung ajanga Lai azüing aser Kekhriesilie, Asst. Professor ajanga sentong tembanga sarasadem Christmas chiyong chiyonga liasü.

37buba Royal Club Kohima Raising Day mungogo



Kohima, Yimpoksüi/November 3 (TYO): 37buba Royal Club Kohima (RCK) Raising Day November 1 nü Ruliezou, Kohima nung mungogo. Iba sentong nung Angami Public Organization tir Thejao Vihienuo-a tongti o jembirtem rongnung ka liasü.

Club züngsemtem den o jembiba mapang Thejao Vihienuo-i, club tenzükerba puti otsü lepa reprangshia jembiba, aser AIFF affiliated asayamung Royal Gold Cup densema club-i inyakyim tajungba balala benoka inyakba indang jembiba liasü.

Pai ashiba agi, club ngutetertem tejangraba aser nükjidong ka sür longjemba ajanga iba club poktet aser club tenzükerba ya rongsen aazüktsü mesüra meraket jenjang ka

asoshi masü saka lokti asoshi tenzükerba lir.

Club joko mapang talangka inyaksangshi masür ta shia pai club züngsemtem dang bendanga agütsüshitsü aser parnok tejangraba asüngsashitsü ajungshia liasü.

Sentong nungsa Er Khupi Natso, Rtd Engineer-in-Chief-i, tain küma aoba mapang nisung aika temang nung timtem adokba aser medical tsütsü timtem ajangshibatem dak rangloker sentepa aliba lokti ajangshi.

Pa temang nung timtem ajangshiba indang jembiba mapang pai, Tsüngremi temaotsü agütsüba aser Pa ajangba indang lemsatepba liasü.

Sentong nungsa Naga nung lokti-i tang ajangshia aoba ken o balala indang

senksak asem aser iba sülen 2024-2027 tenure atema ketdangpur tasentem sangdonga liasü.

Menden tasenba nung tir Kesao Kesiezie, Vice President Ruokuo Kire, General Secretary Kenny Peseyie aser Treasurer Neibao Nakhro nung densema lir.

Iba sentong ya Kepelhutuo Nakhro, Vice President lenisüba nung agi aser Viechuhu Liezietsu-i Tsüngrem temoatsü meshizüka sarasademba sülen T Abao Kire-i tir o jembiba aser General Secretary o Treasurer osang Kenny Peseyie aser Ahelie Theyo nati agüja liasü.

Maneni sentong nung Atsuu Miachieo-i tepela o jembiba aser Ruokuo Kire tenüngsang agüja sarasademba sülen sentong tembanga liasü.

Mon nung matamabensar nem teyari agütsütsü

Dimapur, Yimpoksüi/Nov. 03 (TYO): District Administration, Mon ajanga Government of India meyong ALIMCO (Artificial Limbs Manufacturing Corporation of India) den lungjemer jangjateta aliba matamabensar nem nungdakba teyari aser osettsüset agütsütsü, ta Deputy Commissioner, Mon, Ajit Kumar Verma-i sangdong ka nung ashi.

Mon district kübok block balala nung July 24-30, 2024 anogotem special assessment camp agiba nung ajemdaker

jangjateta aliba matamabensar nem iba teyari ya agütsütsü.

Item osettsüset lema agütsüba sentong ya November 8, 2024 anüngdang 11:00 ako nungi tenzüker Deputy Commissioner Office Complex nung agitsü.

Anungji blocks balala kübok assessment camp agiba nung ajemdaker shima aliba beneficiaries tem identity card (Aadhar card) den Disability Proof bener arua adentsü ayongzüker, ta sangdong ajanga ashi.

Manipur nung telungpur trok apu

Imphal, Yimpoksüi/Nov. 03 (Agencies): Manipur nung tashiyim amshia senotsü meshiba aser nisung pua bener aoba mapa nung dena lir südi ta temulung melema aliba telungpur nisung trok Manipur Police indang Anti-Extortion Squad ajanga apu.

Police temi operation agiba mapang tapoktsü oset, gari, semotsü meshiba shiti aser digital oset kar ngutet ta ashir.

Nisung trok ya telok balala nungi lir aser tesüiba ghonda 24 tsüngta Thoubal aser Bishnupur districts kübok tesem ana nung tenük yoker operation agiba nung apu.

Mezüngbuba nung parnoki Charangpat Mayai Leikai, Thoubal nung meita aoba mapang Kangleipak Communist Party - People's War Group (KCP-PWG) nungi nisung pongu apu.

Iba mapang 36 HE hand

grenade ka, KCP (PWG) indang demand letters ana, mobile handsets ana, SIM cards 13 aser tetsüng pezü aketba gari ka parnok ket nungi ngutet. Pua alirtem ya Thokchom Bikram Singh (29), Sinam Bijen Singh (37), Thangjam Deepak Singh (30), Lambamayum Naobi Singh (26), aser Huiningsumbam Ton Singh (21) ta jangaogo.

Ano Kumbi area, Bishnupur District nungi People's Revolutionary Party of Kangleipak-Progressive züngsem Nongmaithem Gunamani alias Allu (32) apu.

Pa ya tashiyim amshia senotsü meshiba nung shilem agia lir ta ashir.

Pa ket nungi police temi 36-hand grenade ka, motorcycle ka aser mobile handset ka ngutet.

Pua aliba nisungtem den osettsüset ya police ket nung lir aser ozüing agi melaba mera agitar, ta police temi ashi.

Temeteter temi mapa inyaktsü mejangraba ajanga Nagaland tim atemer: Temjen Imna Along

Dimapur, Yimpoksüi/Nov. 03 (TYO): Azüngtsü aser zülutsü meteta alirtemi mapa inyaktsü memulungba ajanga Nagaland tim atemer, ta Minister, Higher Education & Tourism, Temjen Imna Along-i ashi.

Livingstone Foundation International College, Dimapur nung October 29, 2024 nü tenzükerba All Nagaland College Students' Union (ANCSU) Collegiate meet nung Chief Host ama November 1, 2024 nü jembidang pai iba olen ya shia liasü.

State sorkar nung department 88 dang lir, saka asen state nung lokti tentet meyirijang 10-15 tsüngta lir, anungji kaketshir temi unions aser syndicate system metenzüktsüla, ta pai ashi.

College nung kin shia kaketshir telok tentetba yimya anentsüla, kechiaser college indang students' union ajanga kaketshir ajunga nungdakba jembiba inyaktsü, ta Minister Along-i ashi.

Digital sapang balala ajanga alima rangben osangtsüsang asenoki angur aser meteter aser kaketshirtem ya WhatsApp aser Instagram amala University of Social Media nung lir asünungji, tajung

kechi aji meteta alitsüla, ta ashi. Junga meshisadangi aser tapi agi pei bilemba social media nung lemsatepba ajanga lokti nung timtem ang bena arutsü, ta Minister Imna Along-i ashi.

Kaketshir indang scholarship dak sendakba nung pai kaketshirtem dang form agütsütsü atema arsanga cafe bushia moi pei college nung ketdangsür tesayur aser professors tem nungi shisa agitsü ayongzüker liasü.

Minister-isa kaketshirtem dang kati ka dak nungi angazüktsü aser tsürabor aser nüburtemi aginüba ama akumtsü aser asen state yimchiyimjung nung alitsü atema inyaktsüla, ta ayongzüker.

Tetushi tesemdanger Dr. Hiteswar Baruah, Managing Director Nemcare Hospital, Guwahati ajanga sentong nung o tatsüka jembidang kaketshir dak lokti yangertsü tashi kisüing aliba kisüing masü saka alima tajungba kumdaktsütsü asoshi teinyaktsü mapa lir, ta ashi.

Iba sentong nung Director, Livingstone Foundation International, Ani Yepthomi-i tajungshi o jembiba aser Information & Publicity Secretary, ANCSU, Kivika Yeptho-i pela agizükba o jembiba liasü.

BJP-i Jharkhand assembly election atema party manifesto saya



भारतीय जनता पार्टी, झारखंड प्रदेश

November 03, 2024 nü Ranchi nung Union Minister aser BJP lenir, Amit Shah den Jharkhand BJP Tir Babulal Marandi aser tangartemi Jharkhand Assembly election atema party manifesto sayadang tangokba noksa nung angur.

New Delhi/Ranchi, Yimpoksüi/November 03

(Agencies): Amongnü Jharkhand yimtiba, Ranchi nung Union Home Minister, Amit Shah-i Jharkhand Assembly election atema Bharatiya Janata Party indang manifesto, 'Sankalp Patra' sayatsüogo.

Manifesto sayaba sentong nungji Assam Chief Minister Himanta Biswa Sarma, Union minister tem- Shivraj Singh Chouhan aser Sanjay Seth na aser BJP Jharkhand Tir, Babulal Marandi nungera densema liasü.

Manifesto sayaba sentong nung jembidang Amit Shah-i, "Iba election ya Jharkhand atema kanga tongtibang election ka asütsü. Jharkhand nung iba election ya sorkar melentsü atema election dang masü saka Jharkhand tarutsü tia latettsü atema kanga tongtibang election ka asütsü. Jharkhand nüburtemi ochimashi sorkar ka asü Ato kilonser Modi leniba nung terenlok lenmang nung tejakleni aoba BJP sorkar

shimtsüar telemtetba agütsü," ta metetdaksü.

Amit Shah-i, BJP nükjiongji Jharkhand maitsü kümzüksü, litsü kümzüksü aser tetsürtem kümzüksü atema lir, ta metetdaksü.

Jharkhand assembly election atema BJP manifesto nung tenangzükba aika lir aser item rongnung- Jharkhand nung BJP-i Uniform Civil Code (UCC) benoktsü saka iba ozüng kübok tribal nisungtembo malentsü.

BJP-i takok ngua sorkar kümra Sarna religious code akhangba agizüksü atema inyaksü aser industrial den mining ajanga prokshia aliba nüburtemi nem teyari agütsütsü.

BJP-isa mapa maongka 500,000 agütsütsü aser item mapa nungji sorkar mapa 287,000 densema lir, ta manifesto nung nangzükba lir.

Jharkhand nung exam paper leak asüba tatalokbatem bushisüngdangtsü atema CBI aser SIT nem mapa nungloktsütsü aser aibelenertem

nem temerenshi agütsütsü.

Ali rakzükba agirtem ket nungi tanaben ali agütsü atema ozüng ka benoktsü aser ozüng alema arurtem state nungi meindoktsü, ta manifesto nung nangzükba lir.

'Gogo Didi scheme' kübok tetsürtem nem ita shia sen 2,100 agütsütsü aser Diwali den Rakshabandhan benjungtem nung LPG Cylinder angati agütsütsü.

BJP-isa kibong million 2.1 nem teti atema ki agütsütsü aser tzi connection agütsütsü.

BJP-i Laxmi Johar Yojana kübok gas cylinders ka nung sen 500 agi agütsütsü aser küm shia gas cylinder anana angati agütsütsü.

Jharkhand nung Assembly menden 81 atema election shilem ana lemsar November 13 aser November 20 anogotem nung agütsü aser November 23 nü vote azüngtsü.

Taoba state election nung Jharkhand Mukti Morcha-i menden 30 nung takok ngua liasü, BJP-i menden 25 aser Congress-i menden 16 ngua liasü.

Modi sorkari Jharkhand nem sen 1.36 lakh crore tagütsütsü lir: Jairam Ramesh

New Delhi, November 03

(Agencies): Amongnü Congress Party-i, BJP-i Jharkhand nung nüburtemi dang vote memeshidang parnoki tamasa state nem tagütsütsü aliba sen 1.36 lakh crore agütsütsü, ta metetdaksü.

Congress general secretary,

Jairam Ramesh-i, Centre sorkari coal royalties aser central scheme kübok Jharkhand nem sen crore aika tagütsütsü lir, ta ashi.

Jharkhand BJP unit dang Ramesh-i, kechiba Centre-i state nem sen magütsür aser kechiba Ato kilonseri iba atemaji

ola madoker?, ta asüngdang.

Ramesh-i X ajanga, "Jharkhand nung nüburtemi dang vote memeshidang tamasa BJP-i state nem sen 1.36 lakh crores agütsütsü," ta metetdaksü. Tang Jharkhand nung JMM aser Congress teloktep sorkar lir.

NC-i Kashmir nung kiralongra tatalokbatem bushisüngdangtsü akhanger

Srinagar, November 03

(Agencies): Jammu & Kashmir nung National Conference (NC) sorkari, Chief Minister Omar Abdullah-i tenangzükba agiba sülen Kashmir nung kiralongra tatalokba kanga bulua kümogo, anungji item tatalokba bushisüngdangtsü, ta metetdaksü.

National Conference-isa, nüburtemi shimtetba sorkar tenüng menüktsütsü atema kari meranger, ta metetdaksü.

Sentong ka nung jembidang NC Tir, Farooq Abdullah-i, "Rara aika ataloker. Item tatalokba ya bushisüngdangtsü nüngdak. Aibelenertemi taküm aputsüla. Ya shirnoki inyakerar metettsüla, kechiyong parnoki onok tenüng menüktsütsü meranger," ta ashi.

Abdullah-i, assembly election tesünep nung agitetba ya Kashmir nung atema takok tuluka liasü, aser ibaji ajanga nüburtemi ajak longjemdaksü, ta ashi.

Paisa, "Asenoki tangatetba balala toktsür longjema alitsü nüngdak. Tsükchirtemi tip ajaklen nungi asenok amaker, saka asenoki parnok anema raratsüla," ta ashi.

Honibarnü Khanyar area nung kiralongrartem den raradang sepai pezü yiruba

sülen pai item o ya jembia liasü. Ano külen Jammu & Kashmir nung NC den teloktep party Congress-ia, tawa Kashmir nung kiralongra tatalokba kanga bulua akümba atema tashishiba olen metetdaksü.

Jammu & Kashmir nung Congress Tir, Tariq Hameed Karra-i, "Iba ya tebilemtsü onük tuluka lir aser tawa yamai kanga bulua atalokba nung ya melung malemtsüsa lir, kechiyong election bo tesünep nung agiteta liasü. Election matongdanga tesünep liasü, saka election atemba sülen kiralongrartemi kanga bulua amaker," ta metetdaksü.

Paisa, "LG, Manoj Sinha-i senden ayongzükba security tensa asadanga mapang nung ni, iba ya lenla ajaklen nungi asadangtsüla ta shiogo," ta metetdaksü.

Paisa, tamalen Lieutenant Governor, Ato kilonser, Home minister aser BJP-i, kobi melii J&K nem state jenjang agütsütsü ta jembia liasü, saka tangbo BJP-i tensa majung ta jembir, ta ashi.

"Anungji tang tensa raksadaksüba ya shirnoki, ta melung malemtsüsa akümer. Item tatalokba ya bushisüngdangtsü nüngdak," ta Congress lenirisa metetdaksü.



November 03, 2024 nü New Delhi nung Jamiat Ulema-E-Hind-i ayongzükba 'Save Constitution' senden nung Maulana Arshab Madani-i jembidang tangokba noksa nung angur.

Küm 7 tsüngda India nung TB agi shiranger shilem 18 ajema kümogo

New Delhi, Yimpoksüi/November 03

(Agencies): World Health Organisation (WHO)-i, 2015 küm nungi 2023 küm tsüngda India nung tuberculosis (TB) tashidak agi shiranger shilem 18 ajema kümogo, ta metetdaksü.

WHO report ajanga, 2015 küm India nung nütsüng lakh 1 shia nung TB agi shiranger 237 liasü saka 2023 küm nungbo India nung nisung lakh 1 shia nungi TB agi shiranger 195 dang kümogo, aser ibaji shilem 18 ajema akümba lir, ta metetdaksü.

Alima nung 2015 küm nungi 2023 küm tashi nung TB agi shiranger shilem 8 ajema aküm saka India nungbo shilem

anasü agi ajema kümogo.

Health Ministry nung ketdangser kati, "Iba ama mera tulu agia inyaktetba ya India-i TB anema mapatong tajung benoka inyakba aser linük tesem ajaklen Ayushman Arogya Mandir lakh 1.7 ajanga healthcare services agütsüba ajanga lir," ta metetdaksü.

Yaküm TB agi shirangertem asüba kanga ajema liasü; shilem 21 agi tajemba aküm.

Health Ministry-isa, "TB atema budget 5.3 ben agi teimba lemsütsü. 2015 küm sen crore 640 lemsükja liasü saka 2022-23 nungbo sen crore 3,400 lemsükja liasü," ta metetdaksü.



November 03, 2024 nü Wayanad nung AICC General Secretary aser Wayanad Lok Sabha by-election nung party candidate, Priyanka Gandhi election nüboyim sentong ka nung tangokba noksa nung angur.



TIR YIMYIM YIMOBILEM (EDITORIAL)

DIMAPUR TENTONÜ, NOVEMBER (YIMPOKSÜI) 04, 2024

District aika menügdaker

Küm 60 jakdangbo tang Nagaland state ta ajaba nung alir Naga nungertem dang masü saka temeket nung alinük agi tangjema alir Naga nungertem den Naga tenem ajunga ya Assam kübok Naga Hill ta ser district ka dang liasü. Iba nung jagi ano Naga Hills Tuensang Area (NHTA) ta ser district asem Kohima, Mokochung aser Tuensang ta aküm. Iba sülen Nagaland state kümteta aodang district asem agi tenet aküm, tenet agi ti aküm aser tangbo yashi akümba Meluri district dena Nagaland nung district ajak agi tertenet kümogo. Atangji, Dimapur district dak alaka district shiaji Naga kin shia district kaka agütsür amai agütsüogo, anungji Nagaland nung alir Naga kin ajak tangbo temulung ser alitsü südi. Ajisüaka, Nagaland ama alinük tila, nütsüng ishika aser ali rongsen nunga sensaker yimkong ta asüba lima aser state nung district aika akümbaji temoatsü masü khuret dang asütsü. District balaka akümbaji terenlok mapa ka bener arutsür masü saka nübertem nügdak repringtsü asoshi ketdangsertem yokerba dang, anungji district tasen ka akümbaji police station tasen ka lapoker amai ka dang kumadoktsü. Talisa, tanü putu ya anogo shia Information technology ajanga alima tilaba-tilaba kumadokba putu ka lir, anungji akhidang anogo piyong agia shiti lema jajaba mapa to anenogo aser tangbo osangtsüsang sangdongtsü atema second-minute dang agiba putu kümogo. Iba jagi tanü lima nungbo yimten yimsüsüba aser shishilembaba ajak electronics agi dang E-governance aser E-commerce ajanga inyakteper. Iba jagi yimten aser shishilembaba mapa nung dang masü saka saisapongba maparen nunga asayadak nisung meyrirjang aika mentettsüsa yanglutsüba kangabo menügdak kümogo, kechiyong tanübo nisung aikati asayaba tesem tonga orr repringtsü melena pei kidang nungi pei medemer aser kinungertem den senotsü aser mapang talila meindoki repringer. Kasaji, tanü asen lima yimten inyakyima, joko, aika office tonga tsüngdong maoyonga online nung inyaktettsüsa mapa aika tenzükogo. Aji oda, tanü asungbo ILP yanglutsü asoshia DC office tonga tsüngdong aotsü menügdaker. Aji oda, kopi melii tanü DC office nungi inyakba mapatem aika online nung inyaktettsü. Akhidangbo kaketreju nung admission agitsü asoshia tsüngdonga oa liasü saka tanü asungbo tsüngdong moi online nung inyaker, kasaji kaketshirtem scholarship maparena online nung dak inyakteper. Aji oda, tanü putu nungbo sendena dena zoom aser Google ajanga dang pei pei alidak nungi pei tebilemba shitepa senden alir. Iba ama putu nung, office nung asüyonga, alu nung asüyonga inyaker nisung aika menügdaker, kechiyong akhidang nisung teka agi inyaka aliba mapatem to tanübo electronics aser machine agi dang inyaker. Ibayongji, tanübo mapa inyakdak ajak nung inyakterem ishishi dang nügdaker. Aji oda, kecha mapa maka aser senotsüa mali ser DC office lapokyonga aobaji, kidang teinyaktsü mapaa maka aser tachi-tajemtsüa kecha maka aser nisung talila anioka lidaktsü amai asütsü. Tang amaisa ao nungbo DC nem ita sen magütsütet akümstsü aser DC office lapokbaji nübertem teyaridak angudak masü tebilemstsüang ka kumadoktsü. Naga nunger yimten nüchiso bushia-bushia district-ang meshitsü jembia amato, district 17 den nüchiso bushir telokbo 20 dak tali kümyonga aoba ya asenok nübertem aser asen government asoshi tamakok asütsü. Asenoki aginü maginü ta masü district 17 yagibo talangkabo moutettsü aser nügdaka madoker. Aji, tanü putu nungbo Nagaland state ama ka asoshibo district asem-a aika asütsü. Aji asenok ajaki iba tebilemba ya khen süokia ia bilemdanger ait nung alir yimsüsürtem den lemsatepdi.

OLEMSABANG

Sarasadem tesep koma asü nung tajungba süla

~ Limatula Longkumer.

(Yashi adok nungi...)

- Sarasadem tesep kiburtemji züngdangyonga ora tetsüri lapokba teimba lir. Tanga bendanglima nunga sarasadem tesep kiburtemji tetsür teimba angutsü. Iba yagi arogo asoshi kechi tetuyuba agütsür ? Arogo inyakyim yayim (structure) nung tetsürtem sadema meinyaktetba tuyur, arogotsür rongnung dangashi arogo yinti nung ano tetsürtem sadema meinyakteter. Anungji prayer centre nungji tetsür-tebur ajaki külemi pei akokba yari shilem agitsü leman lapoktsür. Iba yagi arogo lenisüba nung tetsürtem nem tim shilem (leadership and partnership ministry) magütsüba tebilemstsü tuyur asü ?
- Ano sarasadem tesep ki nungji kibur dang masü, saka counsellor-temji teimba ka theology mazüng, general education-a junga manguba rogo aika lir. Saka tanela sempet aka nungji (Qualification) parnok yamala centre nungji tenzükur. Takar, tular, sensaker, tilar ajaki parnok tsüngdangi aor, aser sarasademdaksür, Bible study aser counselling agütsür. Iba nungji Lai ratet aser tesayuba agütsüba nungji timtem aiben adoktsü akok, kechiba sra Lai ratetba nungji tanela lenisba denji Laishiba tapak angateta azngtsbaji tongtibang lir.
- Ashiko sarasadem tesep ya kar asoshi employment angudak ka asütsü akok. Amanger, ajaki Tsüngrem tanela tetuyuba nung centre lapoker ta kuli tejangja agütsütsü südi, saka jungjunga shisadangra iba ya industry ka, self employment amai mekümdangra asen lima nung lapoka aotsü. Theological college lapokbaji fashion ka ama khen mapang ka nung lapokogo aser tang prayer centre lapoka aor.

Prayer Centre aser Arogo

Arogo aser prayer centre tesentaktep kechi lir? Sarasadem tesep yagi arogo inyakyim nung jangjonger asü? Arogo aser Sarasadem Tesep tesentaktep nung timtem kar adoka ali asü? Mesüra arogo dang nungi parnoki ministry tajungba bener aor asü? Arogo asoshi sarasadem tesep ya teyarir tajung ka amai, arogo teinyaktsü aika parnoki inyakatoker asünungji arogo mapa pongpa kümdaktsür asü? Amanger tang tashi nungbo kecha telemsatep, tejashitep aser tashishitep malitsü südi. Saka kechiba külem arogo züngsemi arogo toktsür yamai fellowship tenzüka aor ta aiben bilemer. Arogotemi tenzükba wadang khen süoki ia bilemdangtsü mapang tonga aitogo. Ao lima nung arogotem kanga dang institutionalized süatoker, secular office ama dang küma odaki. Arogo ya kechi atema alir ? Tsüngrem tenzükba tetezü khen lepa repringshitsü mapang tongogo. Nüburtem asoshi tanela chiyungtsu prayer centre nungjiang angur asü ?

Sarasadem Tesep Den Sentakba Nung Temelenshitsü Kar

Yangi sarasadem tesep nung temelenshitsü ta asüdang, iba nung ya sarasadem tesep aser arogo anaprongla nung inyakyim melenshitsü nügdaker ta ajiteter. Anungji yangi yamai asünung jungdisü ta kü tebilemba kar lemsateper.

Prayer Centre Arogo kübok aita achayangtsüla: Prayer Centre ya local arogo kübok yutet nungbo tajungtiba asütsü amai bilemer. Iba ya arogo nung ministry tongtibang ka küma nüburtem tanela nung tsüratemdaktsü nungbo tajungtiba asütsü. Shitakba agi prayer centre-i inyakya aliba ya arogoi inyaktsüba mapa lir ta angatetdi. Mesüra Mungdang küboki anioka, guidance teperi agüja anepalu nunga ajungtsü asü ta bilemer. Arogo aika nung prayer mountain, prayer room, ta nüburtem sarasademtsü lapoka yuja lir. Yamalaji mesüka arogoi sarasademtsü tesem lapoktsütsüla. Iba jagi jentipur ajangzüktettsü aser tanela ain akettertema pei sempet amshitsü leman sadema angur.

(Maneni asüng adok nungi...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Missionary Beau Shroyer tepsetha ken o nung pa kinüngtsü apu



Missionary Beau Shroyer'er kibong noksa nung angur.

November 03, 2024: Africa kübok Angola nung missionary, Beau Shroyer tepsetha ken o dak sendakba nung ketdangsertemi pa kinüngtsü, Jackie Shroyer puogo. Arrshi küm 44, Beau Shroyer ya taoba mapang pastor inyaka liasü aser Angola linük nung missionary teinyakdak liasü. Lakes Area Vineyard

Church nung pastor Troy M. Easton-i sangdong ka ajanga Arogo nung züngsemtem dang, "Tanü asenok mangyim tejashi ano taliba bendenloker, kechiyong missionary tepsetba ken o dak sendakba nung pa kinüngtsü, Jackie Shroyer puogo, ta osang angazüker," ta metetdaktsü. Minnesota nung aliba Arogoi, missionary Beau

October 25 nü tepset, ta metetdakja liasü. 2021 küm Shroyers kibong Angola-i oa liasü. North Carolina nung amenoka aliba Evangelical organization- SIM USA nungi par kibong rangben misssionary mapa inyaksü atema Angola-i ao. Par kibong Angola-i maodang Beau ya Lakes Area Vineyard Church nung pastor inyaka liasü. Tamalen pa Detroit Lakes Police Department nunga inyaka liasü aser real estate agent-a inyakogo. SIM USA nung Chief Personnel Officer aser General Counsel, Mark Bosscher-i, missionary kinüngtsü Jackie nem legal teyari agütsütsü atema organization-i inyakdar aser Lakes Area Vineyard Church-i yarisema Shroyer'er tanur ponguprongla anepalua repringdar, ta metetdaktsü.

Gujarat nung lanur 160 Khristan retreat nung aden

November 03, 2024: October 28, 2024 nü Gujarat state kübok Vapi nung Evangelical Fellowship of India (EFI) aser Suvartha Church nati senteper ayongzükba Youth Retreat ka nung lanur 160 dak tema aden. Anogo ka Youth Retreat ji Vapi nung aliba Suvartha Arogo nung ayongzüka agi. Iba sentong ya tanela asentenshi, lanurtem nem tashi agütsüba aser nütsüngsüba nung rangloker agi. Iba sentong nung Rev. Ashish Hirday, Global Facilitator, WEA Youth Commission aser One Man Band nungi Gladson Peter nati jembia liasü. Evangelical Fellowship of India (EFI) nung General

Secretary, Rev. Vijayesh Lal-i, "Tanü lanurtem rongnung tejangraba tulu repringteta onok ajungmesor. Lanurtemi tayongzükba jenti ajangshiba putu ka nung lanurtemi tanela asentenshitsü aser tamangertem rongnung tesendaktep atema inyakba ngua pelar. Tang ama retreat ayongzüka agiba ya ajanga tarutsü atema lenirtem tajung aika adokdaktsütsü," ta metetdaktsü. Anepdang 9:00 ako nungi aonung 7:00 ako tashi agiba sentong nung lanurtemi shilem tajung agi. Rev. Ashish Hirday-i sentong tenzuka 'Nü taküm atema Tsüngremer sentongji kechi?' ta asüba onük jembia liasü aser West India nung EFI

Secretary Jimmy Damore-i "Nü taküm nung Tsüngremer sentong koma metettsü?" ta asüba onük jembia. Kasa sentong nung Gladson Peter-i taküm kuli lemsatepba den külemi pei taküm nung Tsüngrem sentong angateta jajaba lenirtem taküm otsü kar lemsatepa liasü. Nikongdang session nung saisapong kar asayaba den külemi onük balala nung o lemtep aser tanela tsütsü sensaksema liasü. Iba retreat tatembangbuba sentong nung Rev. Ashish Hirday-i "Yisu dak ranglokang" ta asüba onük jembiba sülen shilem agirtemi pei taküm bendanga agütsüshia liasü.



World Sunday School Day sentong nung Nükmen Ao Baptist Arogo Dimapur lanurtemi ken ajanga shilem agiba noksa nung angur. (Dimapur November 03, 2024)

ANOGO ABEN TSÜNGREM DEN

Talangi atuba

"Aser pai ni Tanela nung tenem tulu talang kati anir atu..." J.Adok 21:10

Iba ama mapang nung asenoki tebilemba balala aika adoker. Alima nung mapa tulu adoka temelenshi adoker. Kijaji kodanga yareta makümer. Aji oda liaka mapang ajak nung tebilemtsü tulutibaji kija takümji lir. Iba dang tali ajak metetsang kodaker Tebui nisung ka kisung yimsüsür inyakba ama telok dak meinyaker. Meimchir Tsüngrem mesükba nung yanglu nungji, petinu tulutibaja meimchir dang nungi tilaba lir. Ajemalutiba tamanger kajaia orion aser pleaides yanglusang senti züi Kalvary kangki nung alizük nung pa/laji senti lir! Teti dang repringa aliba Tsüngrem tenükji kija taküm shia repringa nüka lir ta tangatetba asenoki iba küm tasen tenzükdi.

Khristan ka ama tanü tensa terenlok ajak asenoki tenem kolak nungi repringtsüla. Asenoki temejujket nung noktak nung dang talang nung aliba angutsü. Ali telemok nung mener alima tebur tajungji mangutsü. Ajungket nung mangdang angur. Asenoki lenden tuluba aser metong talangba nguner asenok tenem temejujket nung noktaksüla. Yohan dang Tasen Yirusalem sayutsü atema Pa tenem tulu talang kati anir atu. Ibai masüadang Pa tzüyim küm nung notaker Tsüyim tarok nungji adokba shiruru ngua liasü (J.ADOK 13:1). Tanüa asenoki tawa- tanü lima nungi adokba shiruru aika angur, aser ishikatidang "Tasen Yirusalemji" anüng nungi aluba angur! Aika teküpboklen Tsüyim kümbang nung alir. Idakji tepuatsü aika dang lir. Idakji TV aser radio nung inyakertem alitsü. Anungji idakji anogo shia osang kaket adoker. Magazinetem adoker. Idakji leman nung sensakasenba aser business alitsü.

Khristar nübur alima tzüyim jenjanga alitsüba kodanga masü. Asenoki tenem kolakji repring, shidakba tangatetba nung rangloktsüla, shidakba tangatetba bushitsüla. Asenok tensa tatalokbatemji ain kar shin o den medemdanga, Tanela Temeshi tenük ajanga, Tsüngremer nükjidong aser Khristai tatem nung takok anguba nung rangloker angatettsüla. Asen mapang nung tzüyim nungi adokba shirurutem jaki memeteti "Tasen Yirusalem" asoshi terenemba akar. Tatemsä Kibubai takok angutsüba kuli asür.

Saka asenoki anogo shia taküm nung iba mangdangji koda ayutsü ? Asenoki Laishiba anasa alitsüla. Asenoki Tanela jashidaktsüba mapa, aser telung nung pa kuli asüba anema kümdangtsüla. Tanela Temeshi dak metaloker asenoki küm tasen terenemba lemtettsüla.

Asenoki küm tasen nung item tezüngzüktepba Kibuba den yanglura iba tetezü mejembitetba temoatsütem angutsü. Ni anogo shia sarasadem nung minute semer dak tajemba magütsütsü. Ni hopta shia nisung ka dangbosa Kibuba indang kuli asütsü. Ni anogo shia Tejen aser Tasen Lai nungi maneni azüngtsü. Ni kü taküm nung Yisu melen kecha leman meshimtsü. Asenoki iba küm tepiyong lira, iba jaki tesünep teimla kuli asütsü.



Dimapur Ao Baptist Arogo nung Christian Education Ministry ajanga World Sunday School Day & 10 buba Graduation Day sentong ayongzüka agiba sülen CEM Director Mrs. R. Asenla Jamir-i anir fellowship ajak nungi Grade 12 tesayurtemi SS graduates 249 den külemi agiba noksa ka angur. Iba sentong ya "Kü Sanchanutem Mesüang" Yohan 21:15 omen nung ajemdaker temoatsü tulu ngua agiogo. Sentong nung Mrs. Anenla Imchen menden liasü, Pastor Rev. I. Wati-i Certification of Graduates & Sarasadem shilem agi aser Asso. Pastor. N. Imtatsüng Imchen-i Tsüngrem O jembia. (Dimapur, November 3)

AO OSHI ANGAZÜKDAK:

TANÜ ANGAZÜKTSÜBA OJANG



Tarensen

(adj) tatongi, taren kümteta (layers, lines)

* Oboulai onok dang kin kidong tarensen indang ashi.

Tarendak

(v) atsüayong (hesitation)

* Marbaibo tarendak melii jembir.

OLONG PAITEP # 6971

Grid for OLONG PAITEP # 6971 with numbers 1-24 in various cells.

TIPIEN

- 1. Saku - (4)
6. Songjen - (7)
7. Mali/Tazung - (4)
9. Tasen apok - (6)
11. Songtem - (3)
13. Ata liasü - (5)
16. Tzunglu den külemi tsüker - (3)
17. Aso tilla - (6)
20. Tashi maküm - (4)
24. Tenung kasa jatepba - (7)
25. Ki yangluba oset - (4)

LANGTSÜNGLEN

- 1. Taksep - (3)
2. Langtem - (5)
3. O tamendaktak - (4)
4. Nütsü tebuba - (3)
5. Anungdang tesangwa - (3)
6. Apitet - (5)
7. Yagi jungdaksür - (4)
8. Anogo semer ka - (3)
10. ___ tatsü - (3)
12. Tebur kidong aser zünga kasa tsüngda jatepba - (4)
14. Pela agizükba tapu ka - (5)
15. Tenung atet - (3)
18. Mejanga onü - (5)
19. Talak techira - (4)
21. Maneni - (3)
22. Nübo teyi - (3)
23. Meshi - (3)

OLONG PAITEP # 6970 TELANGZÜBA

TIPIEN :

- 2. Pongsen, 5. Lepko, 7. Omen, 8. Maongka, 10. Yangkhu, 12. Senpong, 14. Angu, 15. Raksa, 16. Arameso,

LANGTSÜNGLEN :

- 1. Alimang, 2. Pongen, 3. Samaru, 4. Nün, 6. Pio, 9. Nungdak, 10. Yongya, 11. Kongro, 13. Ora, 14. Ata.

NAI-A YA METETTER MA



Senior Chamber International Palakkad Legion-i Arjun P. Prasad nem Guinness World Record anguba atema tenüngsang agütsüogo. Prasad-i "rugby ball on pencil tip" mapang talangtiba alongba atema World Record yanglu. Pai minutes 20 ser seconds 11 tashi longdaksü. Prasad ya Indian Bank indang Palakkad branch nung manager lir aser India Book of Records, Asia Book of Records, o Limca Book of Records nungbo tenung zülüokogo.

Gauhati HC-i süngdongtem tsüngdokba anema PIL angadangtsü



Guwahati, November 3, 2024 (Agencies): Assam sorkari Guwahati kübok Dighalipukhuri nung küm noklang aika tain süngdongtem tsüngdoker flyover ka yanglutsü lemtet anema Public Interest Litigation (PIL) ka Gauhati High Court-i angadangtsü mulunga agizükogo.

October 29, 2024 nungi Guwahati nung kaketshirtem,

artists, aser tebilemtsü abenba sensotemi lungkak aitba sülen GHC-i iba osang metetdaksü. Dighalipukhuri nung Noonmati-RBI Point flyover project atema süngdong 27 shi tsüngdoksü sorkari lemteta lir. Chief Justice Vijay Bishnoi aser Justice N Unni Krishnan Nair nati PIL agizükogo aser Brihostibarnü angadangtsü. Journalist ana- Mahesh

Deka aser Chandan Borgohain, aser activist Jayanta Gogoi nungeri PIL benok aser parnok atema okadak senior advocate Vikram Rajkhowa noktaker. PIL benokertemi Gauhati High Court dang expert panel ka shimtsü aser otsüsütsü Dighalipukhuri aser süngdongtem meraksatsüsa flyover atema design tasen ka yanglushitsü ayongzüka lir.

Assam nung BJP züngsem 1 yiru; Congress office 3 raksatsü

Guwahati, November 3, 2024 (Agencies): Nagaon kübok Samaguri Assembly Constituency nung Honibar aonung election dak sendakba lendong ka atalok aser idangji BJP züngsem ka kanga mejungi yiru aser Congress party office asem

raksatsü. BJP züngsem Akbar Ali Kesakhaiti market nungi par kidangi aodang len tom nung amak. Idangji temeket nung alirtemi pa kümzük aser Kawaimari hospital-i anir ao saka pa Nagaon Civil Hospital-i

belenogo. Tanga tatalokba ka nung nisung telok kati Laokhowa Shanti Bazar, 4 No Bogamukh aser 6 No Bogamukh nung Congress office tem amak. Police-i tatalokba anaprong bushisüngdang südar aser yakta nisungtem aputsü imlar.

Meghalaya nung untrained teachers 18,000 atema teyari meshir

Shillong, November 3, 2024 (Agencies): Meghalaya nung sorkar, SSA, ad-hoc aser nija school tem nung untrained teachers 18,000 shi lir.

Iba tebilemtsü atema state sorkari Centre dang Diploma in Elementary Education (D.El.Ed) mesükba online programs tenzüksü atema teyari meshiogo.

"Meghalaya nung untrained teachers nem khen nung training agütsütsüji tamakoktsü. Tesüiba nung Meghalaya

sorkari National Institute of Open Schooling (NIOS) ajanga teacher training agüja aru saka ibaji 2017 nung anen" ta Education Minister Rakkam A Sangma-i ashi.

"Uttarakhand ken o ka nung Supreme Court-i government recruitment atema online D.El.Ed programs ya tim masü ta shiogo. Ajisüta, iba oshidang ajanga Meghalaya nung NIOS-qualified D.El.Ed diploma holders shirnok tang teinyakdak lir parnokbo madener" ta

Rakkam Sangma-i ashi. Iba tayongzükba koktettsü atema Meghalaya state sorkari Ministry of Education, IGNOU aser NIOS dang online program ka tenzükshitsü atema asüngdangogo. Training agitsübaji kanga nungdak saka ajak dang tongtipangbaji bendanga agütsüba aser tenangzükba agiba ajanga dang tesayur mapa shitak inyakteter, ta Meghalaya Education Minister-i ashi.

Manipur police-i KCP(PWG) züngsem 5 apu

Imphal, November 3, 2024 (Agencies): Manipur police-i Thoubal district nung Kangleipak Communist Party (People's War Group) (KCP-PWG) züngsem 5 puogo.

Police-i Charangpat Mayai Leikai nung Thokchom Bikram Singh (29), Sinam Bijen Singh (37), Thangjam Deepak Singh (30), Lambamayum Naobi Singh (26) aser Huiningsumbam Ton Singh (21) nunger apu.

Parnoki nisung pur aoba aser tashi agi sen saruba den külemi ozüng alema mapa aika inyak.

Parnok ket nung 36-type HE Hand grenade, KCP-PWG demand letters, mobile handsets, SIM cards 13 aser gari ka ngutetogo.

November 2 nü Manipur



Police-isa Bishnupur District kübok Kumbi nung People's Revolutionary Party of Kangleipak (PREPAK-PRO) züngsem ka apu.

Iba nisung ya Nongmaithem Gunamani (32) ta jangjaogo aser pai tashiyim agi sen saruba mapa inyaka aru. Pa ket nung 36-type hand grenade, two-wheeler ka aser mobile phone ka ngutetogo.

Manipur tensa mejungi akümba ajanga police aser security forces külemi mapa inyaka arur. National Highway ana- 37 aser 2 nung ketdangsürtemi essential supplies abenba gari 309 tashi tiptema yokogo.

Manipur Police-i hill aser valley district balala nung checkpoints mesüra Nakas 110 lapoka lir.

Iran-i Israel nem telangzüba agütsütsü nangzük

Tehran, Yimpoksüi/Nov. 03 (Agencies): Taoba ita tatemlen amakba mechi tayang kepzüka Israel-i Iranian military sites nung amakba sülen Iran indang Supreme Leader Ayatollah Ali Khamenei-i Israel aser United States nem "tebo raksatsüsa" telangzüba agütsütsü nangzük.

"Tsükchirtem, US aser Zionist yimli (Israel) ajanga ya meteta alitsüla, Iran aser resistance front anema parnoki kechi inyaker, iba atema tebo raksatsüsa telangzüba agütsütsüsa," ta Khamenei-i Hamas aser Hezbollah densema Iran den sendaktepa aliba telungpur teloktem athishia ashi.

1979 küm Tehran nung aliba US embassy rakzüka anogomung atongtsü lia Honibarnü kaketshirtem den senden ka amenba nung jembidang pai iba o ya ashi.

"Mitkar tsütsüsa, nok-nü bendenba tsütsüsa, mesüra yimtenren inyakyim tsütsüsa, tashiyim anema nokdaksü asoshi Iran linük nokdaksü atema renemtsü asenoki nüngdakba mapa ajak

inyaktsüsa," ta pai ashi. Tan hopta Iran-isa par indang missiles meta talangba kumdaksütsü ta shia liasü. "Islamic Republic of Iran-i tang ama timtem maneni ajurura, asenoki asen military doctrine melentsüsa," ta Iran indang Strategic Council on Foreign Relations tekolakba Kamal Kharrazi-i ashi.

Iran-i nuclear nok-nü yanglutsü tashi lir, saka Supreme Leader Ayatollah Ali Khamenei 'mass destruction' nok-nü meyanglutsü shia aliba agi alena lir, ta paisa ashi.

Islamic Republic ajanga October 1 nü Israel nung missile amshia amakba nung telangzüba agüja Israel-i tesüsa maker hopta ka lir Khamenei-i iba o ya jembi. Israel-i Hamas aser Hezbollah nungi lenirtem tepsetba mechi Iran yagia telangzüba agüja amakba lir.

Tang mezüngbuba Israel ketdangsür temi Iran li nung tesem kar amakba nangzük saka parnoki Iranian energy mesüra nuclear facilities nung amakbabo mashi.

Iran ketdangsür temi US tir

election magidang tayang kepzüka amaktsü ta Bodhbarnü shia liasü.

Iran nunger telangzüba tulu agütsütsü atema tematiba jenjang nung linük renema lir, ta Israel mitkar indang osang ka ajanga Brehostibarnü shia liasü.

Kasa mapang American B-52 bombers tem Middle East tonga aruogo, ta US mitkari Honibarnü ashi.

"Minot Air Force Base's 5th Bomb Wing nungi B-52 Stratofortress strategic bombers tem US Central Command area tonga aruogo," ta Middle East aser temeket linüktem atema military command ajanga social media sangdong ka nung ashi.

"Iran aser par partners mesüra proxies temi region nung America nunger sepai mesüra sendaktepa aliba nung tenük yokra United States-i asen nübur kumzüksü asoshi nüngdakba mera ajak agitsü," ta Pentagon odongtar Air Force Major General Patrick Ryder-i Hokulbarnü sangdong ka nung shia liasü.

OFFICE OF THE
AO SENSO TELONGJEM NAHORJAN
Diphu Road
Karbi Anglong (Assam)

METETDAKTSÜR

15th Buba Ao Senso Telongjem Nahorjan, Karbi Anglong: Assam inti-mensem ayonga lir. Anungji, shirnokisa Nahorjan telongtet nung ali kimong alia lir, nenok ajak iba mensem nung arua atentsü sangdonger aser shibaisa 2024 kilen saru magütsü-i lir, iba anogo nungji bener arutsü yimden ketdangpur ajanga metetdaksür.

Anogo : 5th Nov. 2024
Mapang : 10:00 AM
Tesem : Kimen

Sd/-
Wb. Saku Aier
Tir, ASTN

Wb. Toshi
Tongti Tezulur, ASTN

ALI TAYOKTSÜ LIR

OLD SHOWUBA NUNG ALI AYOKER
FOURLANE FLYOVER ANASA
For more details : 9863826159

Gaza polio vaccination drive tenzükshir, Israel-i maneni amaker

Gaza City, Yimpoksüi/Nov. 03 (Agencies): Israel-i amakba aser tenokdangba balala agütsüba ajanga tesem kar nungbo tamakoktsü südi ta bilema liaka United Nations agencies ajanga northern Gaza nung aliba tanurtem asoshi polio vaccination campaign phase tasen ka tenzükogo.

UNICEF ajanga Honibarnü sangdong ka nung tensa kanga

mejungli liaka aiben menur Gaza north tsütsü iba virus anema vaccination campaign tenzükogo ta ashi, koba ajanga tanur temang marakzütetü kumdaksür mesüra südaksür.

Phase mezüngbuba September ita tenzük aser tanur arishi küm ter tekübok 560,000 dak tema nem mozü agüja liasü. Ketdangsür temi tang iba mozü dose tanabuba aser tatembangba agütsütsü meranger.

"Iba polio campaign ya kanga tongtipang lir, saka onoki tanurtem vaccine ajanga kumzükdang, ceasefire tajung aser tejangja ka mali tashi anogoshi parnok maneni asütsü aser tim atemtsü, koba tangsa tali nüngdaker," ta Palestinian refugees atema UNRWA ajanga ashi.

Gaza north tsütsü campaign round tanabuba nükjidong ya tanur 119,000 nem iba mozü agütsütsü lir ta UN-i ashir, saka iba nükjidong tongtettsü ya tamakoktsü amai ajiteter.

Gaza north tsütsü Israel-i amakba ajanga tang jenshia aliba densema Palestine nunger nem vaccine agütsütsü atema tesem 106 nung team 216 inyaktar, ta UN agencies ajanga ashi.

Gaza north tsütsü tesem kar nungbo tensa ya "apocalyptic" ta UN-i ashir, kechiaser Israel-i maneni humanitarian aid nokdang aser ali, anüng aser tzüyim nungi maneni amaker.

North nung Honibarnüa tayimtsü amshia amakba osang lir aser nikongdang Jabalia kübok Naza area nung nisung ana tepset.

Iba rara ya tenzük Gaza nung Palestine nunger 43,341 tepsetogo aser 101,800 dak tema yirua lir, ta Palestinian health ketdangsür temi ashir.

Honibarnü Gaza City nung polio vaccination centre ka amakba nung tanur pezü yiru, ta Honibar aonung World Health Organization ajanga shia liasü.

Küm 25 jakdang Gaza nung polio tashidak samar liasü, saka Israel-i amakba ajanga iba tesem nung healthcare system raksaja tashidak balala pokteta iba virus ya tanaben prokshi tenzük.

Zelenskyy-i anüolen aliba linüktem dang mera agitsü mepeshi

Kyiv, Yimpoksüi/November 3 (Agencies): Ukraine tir Volodymyr Zelenskyy-i parnok den sendaktepa aliba linüktem dang Russia-i yoka aliba North Korea nunger sepaitem raraba tesem tonga mao tsüngda jenjang agitsü atema repranga dang matatsü mepeshia metetdaksüogo.

Kasa mapang nung Ukraine indang army tekolakbai ashiba agi, küm ana tejakdang rara tenzükba sülen Russia nunger sepaitemi parnok tang kanga sashia amakba mapang ka lir.

Zelenskyy-i, North Korea nunger sepaitem anenzüka aliba camp tem amaktsü benokogo aser ashiba agi, Kyiv-i item tesemtem jangja lir. Ajisüaka pai ashiba agi, item tesemtem amaktsü atema anüolen aliba linüktem indang long-range missile tem amshitsü atema parnok nem teyari agütsüba linüktemi temelaba agütsü nung dang takoktsü asütsü.

"Jenang agitsü melena America-ia repranga atadar, Britian-ia repranga atadar, Germany-ia repranga dang atadar. Ajak naprongla North Korea nunger sepaitemi Ukraine nungertem amak tenzüksü dang atadar," ta Zelenskyy-i ashi.

Biden administration-i Brehostibarnü ashiba agi, North Korea nunger sepai 8,000 shi tang Russia kübok Ukraine arrtsü anasa Kursk tesem nung lir aser parnok Russia nunger sepaitem nem teyari agütsütsü atema renemdar.

Honibarnü Ukraine military

intelligence-i ashiba agi, Russia nunger indang sobutsü semer North Korea nunger sepai 7,000 dak tema Ukraine anasa tesem balalai anirogo. Agency koba dang GUR ta ajar parnokisa, North Korea nunger sepaitem Russia anütoklen tesem pongu nung training agidar, ta metetdaksü.

North Korea nunger sepaitem yokba ya rara tamajungba küma aoba temaitsüka aser iba ajanga Asia Pacific tesem nunga mepetmesü adoktsü akok aser Moscow nungi Pyongyang-i technology tem yoktsü atema kishi lapokja, North Korea-i nuclear aser missile sentongtem ajanga amokmerenba taliba küma aotsü akok ta bilemba anüolen aliba linüktem nungi lenirtemi lemsatepogo.

North Korea Foreign Minister Choe Son Hui aser Russia Foreign Minister na Hokolbarnü Moscow nung ajurutepogo.

Ukraine nunger lenirtemi, Russia telung nung prangbong injang bendena ayuba tesem, tayimtsü anendak aser military base tem amaktsü atema anüolen aliba linüktem nung yangluba missile tem amshitsü aiben temelaba meshia arudar.

Iba dak sendakba nung US defence ketdangsürtemi ashiba agi, missile tem kanga aikabo mali aser kasa mapang nung Ukraine-i Russia nung tesem balala amaktsü atema long-range drone tem amshia arudar. Moscow-ia, iba amala missile amshia par linük makra

rara tamajungba küma aotsü ta tekümdangtsü metetdaksüogo. Tir Vladimir Putin-i September 12 nü ashiba agi, missile amshitsü atema temelaba agütsüra parnok US aser NATO state tem den raratsü.

Ukraine nunger commander, General Oleksandr Syrskii-i Honibarnü, Russia nungertem kanga sashia amakba ajanga par sepaitem kanga timtemba mapang ka lir ta ashiba sülen Zelenskyy-i iba tayongzükba ya agüja liasü.

Czech military ketdangsürtem den sensak asema sülen Syrskii-i Telegram ajanga, Ukraine nunger sepaitem rara nung kang akoksadar aser prangbong injang aser hadir balala maneni agüja alitsü nüngdaker, ta ashi.

Syrskii-i koba tesem nung rara kanga mejungli odar iba indang osang tejangja magütsü, ajisüaka Russia-i joko ita aika Ukraine anütoklen tesem balala kanga sashia maka arudar aser iba ajanga Kyiv-i item tesemtem toktsütsüsa kümogo. Ajisüaka Russia-ia, parnok kübok aliba Kursk arrtsü nungi Ukraine nungertem memintokteti arudar, koba ita asem tejakdang amak tenzükba liasü.

Maneni Honibarnü Russia nunger sepaitemi missile amshia Ukraine nung yimti tulutiba rongnung tanabuba Kharkiv makogo. Iba yimti amakba mapang police ka tepset aser nisung aika yiruogo, ta local Governor Oleh Syniehubov-i ashi.

Syniehubov-i aser Ukraine national police force-i ashiba agi, missile ka police tem aika adenshia aliba tesem ka nung tsük aser arishi küm 40 tain police ka tepsetba den tangar 36 yirua liasü.

Ukraine kübok southern Kherson province nung Russia-i missile aser drone amshia tesem balala amakba sülen arishi küm 40 tain tetsür ka asü aser tanur ana densema nisung asem yirua liasü, ta local Governor Oleksandr Prokudin-i ashi. Kasa anogo drone amshia amakba mapang Kherson tesem nung nisung ka yirua liasü, ta Ukraine nunger ketdantsürtemi metetdaksü.

Ano tanur ana densema civilian pongu Dnipropetrovsk tesem nung yiruogo, ta Governor Serhiy Lysak-i ashi.

Honibar anepdang Kyiv nunga air raid sirens ghonda pongu dak tema asadakja liasü, kechiyong Russia nunger drone temi linük yimtiba maka liasü. Kyiv amakba mapang nisung ana yiruogo, ta yimti military administration-i ashi.

Ajak senteper Russia-i Iran nung yangluba Shahed drone 70 dak tema amshia Ukraine makogo, ta Ukrainian air force-i metetdaksü. Parnokisa, drone tem timba khazüka yok mesüra GPS jamming amshia tangaleni yokogo, ta ashi. Drone tem khazüka yokba tsükba mapang power networks aser nisung aliba kitem raksatsüogo aser Kyiv anasa tantsür ka yirua liasü, ta ketdangsürtemi metetdaksü.

New Zealand-i otsüsütsüsa India den Test asayamung kokogo



Yimpoksüi/November 3, 2024 (Agencies): New Zealand aser India na tsungda tasembuba Test asaya Deobarnü Wankhede Stadium, Mumbai nung New Zealand-i run 25 agi koka otsüsütsüsa iba asayamung 3-0 agi kokogo.

2000 küm South Africa-i 2-0 agi akokba sülen India team tang mezüngbuba Test asayamung ka nung asaya ka danga mekoki tembangogo.

New Zealand-i India nung Test asayamung ka danga koker maliasü aser Bengaluru nung mezüngbuba Test asaya wicket ti agika akokba asaya tua küm 36 sülen India nung mezüngbuba Test asaya ka akokba liasü.

“Iba ground nung Test asaya ka akokba ya dang masü saka asayamung 3-0 agi akokba ya jangrademtsüka lir,” ta New Zealand Daryl Mitchell-i ashi,

shiba mezüngbuba innings nung run 82 yanglua liasü.

Asaya akoktsü atema run 147 nungdaka run arishiba mapang India team-i run 121 dang yangluteter asayar ajak out süatok. NZ atema spinner Ajaz Patel-i run 57 agütsür wicket 6 agia liasü.

Asaya nung India team mapang tatsüka tsungda run 29 yanglur aliba mapang asayar 5 tashi out süatoker liasü, ajisüaka Rishabh Pant-i half-century ka yangluba ajanga parnok nem timla agütsü.

Ajisüaka Pant ya run 64 yanglur aliba mapang out sütsü aser iba sülen New Zealand-i ano tanaben asaya azüoka asaya liasü.

Pant ya field nungbo not out agütsü, saka TV umpire-i mapang talangka asadangba sülen ball agi pa indang bat nung kongshiba nguteta out agüja

liasü, koba wicketkeeper Tom Blundell-i aibelen mesüi apu.

Pa out asüba mapang tashi nung India team-i asayar 7 out sür run 106 dang yanglur liasü aser iba sülen tatembangbuba wicket asem yagi run 15 dang yanglu. Iba asaya nung Patel-i innings ana nung run 160 agütsür wicket 11 agia liasü.

Tasemnübuba New Zealand pur batting ameni aitba mapang parnok asayar 9 out sür run 171 yanglur liasü, saka run asem dang yangluba sülen Ravindra Jadeja-i Patel out sütsü. Tanabuba innings nung Jadeja-i run 55 agütsür wicket 5 agi aser innings anaprongla nung run 120 agütsür wicket 10 agia liasü.

Iba asayamung akokba sülen New Zealand team World Test Championship final-i aitsü timla mesamai lir, saka iba ajanga India jenjangbo kanga mejungi kümdaktsüogo.

U-19 World Championships: India nunger boxer temi medal 17 angu

Yimpoksüi/November 3, 2024 (Agencies): Mezüngbuba U-19 World Championships nung Parthavi Grewal, Vanshika Goswami aser Hemant Sangwan nungeri gold medal angu aser India nunger boxer temi ajak senteper medal 17 nguogo.

Iba asayamung ya World Boxing-i, Colorado, USA nung ayongzüka asaya liasü. Iba asayamung nung tetsür asayartemi kanga junga asaya parnok 10-i medal ngua liasü.

Tetsür 65kg final nung Parthavi-i 5-0 agi Netherlands tsür Aaliyah Hoppema akok aser Vanshika-i +80kg category nung Germany tsür Victoria Gatt koka liasü.

Teburtem rongnungi Hemant kijai gold medal ngua liasü. Pai 90kg category nung USA nunger asayar Rishon Sims 4-1 agi koka liasü. Nisha

(51kg), Supriya Devi Thokchom (54kg) aser Kritika Wasan (80kg) nunger ajaki final asaya mekoki silver medal dang ngua liasü.

Khelo India Athletes (KIAs) 11-i medal bener aruogo aser parnok rongnung tibo SAI National Centre of Excellence (NCOE) trainees tem liasü. Medal angurtem rongnung NCOE trainees asem densema liasü shirnok non-KIAs tem lir aser NCOE Rohtak nung training agia liasü.

Medal-anguba Khelo India Athlete tem:

Tebur - Sumit, Lakshay Rathi, Krrish Pal (all NCOE Rohtak), Aryan, Rishi Singh.

Tetsür - Krisha Verma (NCOE Aurangabad), Chanchal Chaudhary, Nisha, Vini, Akansha Phalasal (all NCOE Rohtak), Supriya Devi. Medal-anguba NCOE

Athlete tem:

NCOE Rohtak - Parthavi, Vanshika (Gold), Chanchal, Nisha, Vini, Akansha, Kritika (Silver), Krrish Pal, Sumit, Lakshay Rathi (Bronze).

NCOE Aurangabad - Krisha Verma (Gold).

Medal angurtem:

Gold: Krisha Verma (F75kg), Parthavi Grewal (F65kg), Vanshika Goswami (F+80KG), Hemant Sangwan (M90kg).

Silver: Nisha (F51kg), Supriya Devi Thokchom (F54kg), Kritika Wasan (F80kg), Chanchal Chaudhary (F48kg), Anjali Singh (F57kg), Vini (F60kg), Akansha Phalasal (F70kg), Rahul Kundu (M75kg).

Bronze: Rishi Singh (M50kg), Krrish Pal (M55kg), Sumit (M70kg), Aryan (M85kg), Lakshay Rathi (M90+kg).

Brazil World Cup qualifiers squad sangdongogo

Yimpoksüi/November 3, 2024 (Agencies): Taruba World Cup qualifiers atema Brazil indang national team-i squad sangdongogo, kong Real Madrid nungi Vinicius Jr aser Barcelona nungi Raphinha nati anir asayartem shimer lir. Ajisüaka Brazil coach Dorival Jr-i team nung Neymar mezüngoksem, shiba temekok yiruba ano kanga junga taneptsü mongui lir.

Neymar tawa Asian Champions League nung Al-Hilal nungi asayaago, saka international asaya atemabo meshimi lir.

Kasa mapang nung Raphinha-i tawa Barcelona nungi kanga junga asaya arudar. Pai Real Madrid goal 4-0 agi akokba asaya nung goal idaktsü aser Bayern Munich den asayaba mapanga hat-trick idakja liasü. Vinicius Jr tekong nung timtem aliba ajanga taoba ita qualifiers nung masayaba sülen tang team nung maneni züngoksemogo.


South America nung Brazil team tang pezübuba nung lir aser parnok November 14 nü Venezuela den asayatsü aser anogo pongu lir Uruguay den asayatsü.

Squad nung goalkeepers Bento (Al-Nassr), Ederson

(Manchester City), aser Weverton (Palmeiras). Defender tem rongnung Danilo (Juventus), Vanderson (Monaco), Guilherme Arana (Atletico Mineiro), Abner (Olympique Lyonnais), Eder Militao (Real Madrid), Gabriel Magalhaes (Arsenal), Marquinhos (Paris St Germain), aser Murilo (Nottingham Forest). Midfielder tem rongnung Andre (Wolverhampton Wanderers), Andreas Pereira (Fulham), Bruno Guimaraes (Newcastle United), Gerson (Flamengo), Lucas Paqueta (West Ham United), aser Raphinha (Barcelona). Forward tem rongnung Estevao (Palmeiras), Rodrygo aser Vinicius Jr (Real Madrid), Luiz Henrique aser Igor Jesus (Botafogo), aser Savinho (Manchester City)

Qualifiers nung team jenjang yanglushitsü parnok nükjidong lir. Coach Dorival-i ashiba agi, “onok team ka ama tangatetep ka dangi arua süngjema maküm tashi tera seplasepshitsü akok. Ajisüaka onoki lenmang bushidar aser taruba asaya ishika tsungda team jenjang tajungba kuma yanglushitsü imlar, ajita asünungdang taruba küm onok jenjang tajungba nung alitsü.”

Diana Shnaider-i Hong Kong Open kokogo



kechiyong lai season tepeyong kanga junga asayaago.

“Diana, lar kibong aser lar team nem tenüngsang tetushi tulu agütsür. Hopta tepeyong jangaradema asayaago aser season kanga junga asaya tembangtetogo,” ta arishi küm 28 taina asayar yagi ashi.

“Nai tanü ni kanga amokbanger asaya maongka kecha magütsü, ajisüaka taruba asaya nungbo ni lepa agütsütsü.

“Kü team dang kanga pelar. Nenoki ni asayar tajungba kuma asayatsü atema anogoshia nongshir aser ni tanga asayamungtem nung tashi taitba meyipa arua asayatsü. Asenok ajak longjemer season kanga junga asayaago,” ta Boulter-i ashi.

Shnaider-i taküm la asayaba WTA finals pezüprongla kokogo. Lai iba asayamung makok tsungda Thailand, Hungary aser Germany nung asayamung balala koker liasü.

“Ni kanga pelar,” ta arishi küm 20 tain asayar yagi ashi. “Ni season shia iba amai asayatetsü imlar.

“Ni maneni meranga inyaktsü. Season nung tatembangbuba asayamung akokba atema ni kanga pelar. Hopta tepeyong jangradema asayaago,” ta Shnaider-i ashi.

BILEMDANGANG

“Nü otsüji nai dang melenshitetsü.”